

四庫全書

史部

欽定四庫全書

吳興脩志卷四

明 董斯張 撰

官師徵第四之三

郡守

唐

吳越

武德載河南緱氏人天后從父弟湖州刺史

唐武元
衡傳

崔元譽清河人崔順博陵人陸海吳郡人竇季安洛陽

人楊鑑馮翊人並湖州刺史

唐宰相世系表
五人蒞任年月並不詳

韋章韋敬先京兆人並出逍遙公房湖州刺史韋明敬

京兆人出鄭公房守湖州歷華州刺史

以上四人蒞任年月載談志

徐嶠之開元十三年自吉州刺史授

談志

嶠之字惟嶽會稽人見徐浩傳即浩父也

杜位襄陽人考功郎中湖州刺史

唐宰相世系表

張按舊唐書李林甫子婿杜位為補闕少陵有杜位

宅守歲詩云守歲阿咸家又有寄位詩云近聞寬法

離新州想見歸懷尚百憂蓋位以林甫故得竄至乾

寧中朝廷寬其罪移之于近郡也少陵寄位詩正渠

刺湖州時耶

周擇從自饒州刺史移湖州有令聞歷尚書禮部侍郎

談志叅顧况刺史廳壁
記柳宗元龍安禪寺碑

獨孤問俗上元元年自明州刺史授

談志

李史魚遷侍御史充幽州行軍司馬隔于亮盜詔不

下達公與獨孤問俗密結壯俠志圖博浪之舉間遣

表章請固河潼之守帝用深嘉吾謀未行

梁肅李史
魚墓志

宜興高智周作相同邑蔣繒往見之智周妻以女生子

挺歷湖延二州刺史

宜興志

明皇時監察御史蔣挺坐法勅令朝堂杖之張守珪

奏曰御史憲司清望耳目之官有犯當殺即殺當流

即流不可決杖士可殺而不可辱也

唐書

徐元之建昌人年十七第進士累遷監察御史諫議大

夫開元七年出為湖州刺史有集十卷

一統志

鄭繇者鄭州滎陽人北齊吏部尚書述五代孫也繇嗣

聖元年進士工五言詩開元初岐王範刺岐州繇為長

史範失白鷹繇為失白鷹詩當時以為絕唱後為湖州

刺史

舊唐書

徐煇開元二十三年自登州刺史授不曾之任轉洪州

刺史

談志

唐沛郡武太冲為吳興太守增葺舊廳棟宇既就有大

白蛇長數丈橫于廳前筮者曰此項王神也不宜損宜

奠祀之太冲以為正以勝邪吾以子養百姓蛇何能為

有頃蛇遂死

談志

盧幼平寶應三年自杭州刺史授談

志

令狐綯字子直華原人平章事楚之子也太和四年登
進士第會昌五年自戶部員外郎出為湖州刺史大中
二年召拜考功郎中尋知制誥充翰林學士四年改兵
部侍郎同中書門下平章事輔政十年累官吏部尚書
右僕射涼國公先是宣宗謂白敏中曰憲宗葬道遇風
雨六宮百官皆避見頰而髯者奉梓宮不去果誰耶敏
中曰令狐楚上曰有子乎敏中曰緒少風痺不勝用綯

今守湖州因曰其人宰相器也即召之

舊唐書令狐綯
白敏中二傳

顏真卿轉湖州刺史政尚清靜長孤養老徹冗浚湟式
廉明進賢碩特責大指而已郡人悅之立碑頌德令狐
峘魯

公神
道碑

公字清臣小名羨門子別號應方

魯公
行狀

大歷八年癸丑公年六十五正月至任七月追建放

生池碑銘十二月有沈氏述祖德記九年甲寅公年

六十六作妙喜寺碑十一年丙辰公年六十八十二

年丁巳公年六十九四月有柳惲西亭記元載誅楊綰薦公四月召于湖州四月有項王碑行述八月為

刑部尚書

魯公年譜

蕭定字梅臣瑀曾孫歷湖州刺史朱泚反詭姓名為張誕不浼于賊後擢太子太師

唐書

邵說為吏部侍郎薦戶部郎中蕭定自代不許

裴清刺湖州始進金沙泉表上之清在郡時嘗撰吳興

太守歷官記

叅談志顧應祥長興志

第五琦字禹珪長安人少以吏幹進頗能言強國富民
術歷戶部侍郎判度支進同中書門下平章事累封扶
風郡公坐與魚朝恩善刺括州徙饒湖二州後為太子

賓客

唐書

表高字公願滄州人歷御史中丞建中二年出為湖州
刺史尋拜給事中貞元元年德宗復用盧杞刺饒州命
高草詔高執不可改命舍人草之詔不下仍陳京等論
奏高又爭論于上遂追饒州制翌日遣使慰高云朕思

卿言深理切當憲宗朝宰相李吉甫常言高忠鯁詔贈

禮部尚書

參兩
唐書

范傳正字西老順陽人舉進士又以博學宏詞登甲科
歷歙州刺史轉湖州以政事修理聞擢為歙宣觀察使
受代至京師憲宗聞其里第過侈薄之因拜光祿卿傳
正精悍有立好古自勵及為廉察頗事奢侈

唐書

李齊運拜禮部尚書無學術不知大體薦李琦為浙西
觀察使受賂數十萬計舉李詞為湖州刺史既而邑人

告其贓犯上以齊運故不問而遣之

舊唐書

于頔字允元河南人湖州刺史歷左僕射平章事燕國

公諡曰思

頔改蘇州追憾湖州舊尉封杖以計強決之

文獻通考

辛秘字藏之隴西人貞元中登開元禮科高郢為太常卿嘉其禮學授太常博士元和元年刺湖州秘以平李錡功天子親以金印紫綬賞之僉曰秘才堪將帥急徵為河東軍司馬兼御史中丞歷官工部尚書潞州節度

使久歷重任家無豐財為時所稱諡曰昭

舊唐書叅牛僧孺辛祕碑

祕平李錡

詳戰守微

顏防為湖常二州刺史

見舊唐書溫公資治通鑑宋高僧傳及文苑英華李紳辛祕二

碑

勞志及唐志俱以為顧防誤防以永貞元年四月自

澧州刺史授除常州刺史明載談志中勞志雖誤以

顏為顧幸猶存常州一事可以通鑑諸書考証之若

唐志則盡去其除目即謬誤何從辨之乃知昔之人

明載遷除日月良有遠識在古書真不可妄刪字句也李錡恃恩驕恣猖狂弄兵幾效吳淞故事當時非防之奇謀矯制馳檄同仇則辛祕輩亦如蘇州刺史李素見縛賊營生致錡幕矣是役也保障江南防功第一祕次之當時祕有金紫之賞而顏防者殊寂寂未聞豈史偶失書耶抑在朝諸君子祖匡衡故智反以矯制為戎首耶防故一奇士刺湖時必有殊績作志者且并其姓亦誤書非牛李二丞相劉太保通慧禪

師司馬公諸書顏公與曹蜍李志等耳

崔元亮字晦叔磁州人貞元初進士歷湖曹二州太和中為諫議大夫鄭注誣宋申錫捕逮倉卒內外震駭元亮率諫官叩延英苦諫帝感悟頃之移疾歸東都召為虢州刺史卒贈禮部尚書元亮晚好黃老清靜術故所居官未久輒去

叅兩唐書

元亮刺湖州聚羨財而代逋租謹茶法以防黠吏脩堤塘以脩歲旱罷民賴之如依父母

白居易崔公墓志

張文規河東人宰相弘靖子也歷吏部員外郎右丞韋
溫劾之云長慶中弘靖陷在幽州文規徘徊京師不尋
赴難不宜塵污南宮出為安州刺史累遷御史中丞
舊唐書

文規嘗刺湖州著吳興雜錄

薛戎字元夫寶鼎人居陽羨江西觀察使李衡辟置幕
府累衡湖常三州刺史遷浙東觀察使戎為吏不尚約
束詭名譽具有善歸之所部故居官時無灼灼可驚者

已罷則懷之俸入之餘散于宗族身沒之後人無譏焉

叅兩

唐書

公年四十餘始脫褐衣為吏歷刺三州所至以廉貞

寬大稱朝廷嘉之

韓愈薛公墓志

公移刺湖州其最患人者荻塘湖水瀦淤逼塞不能

負舟公濬之百餘里

元稹薛公神道碑

楊漢公字用乂弘農人擢進士釋褐為李絳興元從事絳遇害遁而獲免歷湖亳蘇三州擢荆南節度使召為

工部尚書或劾漢公治荆南貪降祕書監更天平宣武

節度使

舊唐書

王仲脩收唐湖州刺史楊漢公書有鍾法

米襄陽志林

漢公汝士弟樂天之內弟兄也

見長慶集

鄭仁規滎陽人宰相肅孫也仁規有俊才文翰高逸累

遷拾遺補闕尚書郎湖州刺史

舊唐書鄭肅傳

仁規守湖與陸龜蒙友善見龜蒙紀事詩載掌故

陸龜蒙少高放通六經大義尤明春秋舉進士一不中

往從湖州張博游博歷湖蘇二州辟以自佐

新唐書

韋珩太和五年自江州刺史授未視事卒

談志

杜牧字牧之舉賢良方正俄而澤潞平畧如牧策歷司
勲員外郎兼史職改吏部乞為湖州刺史踰年遷中書
舍人牧剛直有奇節不為齷齪小謹敢論列大事指陳
利病尤切至少與李甘宋祁善其通古今善處成敗甘
等不及也

唐書

王鉅歷駕部員外郎中中書舍人知制誥見英華錢珣制

鉅湖州刺史載郡志

姚勗字斯勤，崇裔孫，長慶初擢進士，累遷諫議大夫、更
湖常二州刺史，為宰相李德裕厚善。及德裕為令狐綯
等譖，逐摘索支黨，無敢通勞問。既居海上，家無貲，病無
湯劑，勗數餽餉，候門不薄。時傳為厚，終變。王傳自作壽
藏于萬安山南原，崇瑩之傍，署兆曰：「寂居穴，坟曰復真。」
堂中列土為牀，曰：「化臺。」而刻石告後世。唐書

鹽鐵判官姚勗知河陰縣，嘗雪冤獄。鹽鐵使崔珙奏

加酬獎令權知職方員外郎韋溫執奏曰國朝已來
郎官最為清選不可以賞能吏乃改勗檢校禮部郎
中翌日帝謂楊嗣復曰韋溫不放姚勗入省有故事
否嗣復對曰韋溫志在銓擇清流然姚勗士行無玷
梁公元崇之孫自殿中判鹽鐵案陛下獎之宜也

韋溫

傳

杜孺休乾符元年自戶部郎中授選司勳郎中中和三

年再授

談志

孺休字休之累擢給事中大順中錢鏐遣弟球攻蘇州破之以海昌都將沈粲行刺史事而昭宗更命孺休為之以粲為制置指揮使鏐不悅密遣粲害焉

唐書

宰相世系表
云襄陽人

乾寧三年十一月湖州刺史李師悅求旌節詔置忠國軍于湖州以師悅為節度使賜告身旌節者未入境戊子師悅卒楊行密表師悅子前綿州刺史彥徽知州事

資治通鑑

中和四年武寧將李師悅與尚讓追黃巢至瑕邱敗之巢衆殆盡

乾寧二年董昌構湖州刺史李師悅率兵四千餘人侵我封境三年正月楊行密將安仁義出戰船從湖州將渡江以應董昌王命許再思等禦之仁義竟不

敢渡

吳越
脩史

鮑君福清泰元年自鎮海軍節度副使授

談志

君福餘姚人性淳厚有膽氣能馬上舞雙劍從錢鏐

征伐有功累遷保順軍節度使檢校太尉謚忠壯一統志

光啟二年錢鏐自諸暨越平水鑿山開道五百里出

曹娥埭浙東鎮將鮑君福帥衆降之

資治通鑑

鮑家田吳越相鮑慶臣采地也

西湖游覽志慶臣君福子

湖州刺史李繼徽以州附淮南牙將沈攸拒之繼徽遂奔王親巡吳興取繼徽家屬凡二百餘人而還湖州平

王命海昌鎮將高彥為湖州制置使

以下吳越脩史

高彥字子奇海鹽人前後從征悉有功及繼徽棄郡奔淮南王親巡吳興其將沈攸等皆以已功有代守之望王遂題詩一章于嬰蘭堂在湖州東南溪次末云須將一片地付與有心人衆亦不測王將登舟始言曰吾以此郡付汝宜善撫之彥性淳厚居十一載政頗簡便將終有道場山僧如訥訥口能容拳手垂過膝及入州城彥以師事之一日彥與之語訣別未幾而卒

梁開平三年十月湖州刺史高澧二子我遣其黨焚義和臨平等鎮王命弟鏐率師討之四年二月澧導淮南將李簡陳璋入其境都將盛師友沈行瑜閉城不納王遣子元璪禦之淮人挾澧而遁

澧高彥第三子

梁開平四年三月癸巳王巡吳興命弟鏐為刺史癸卯至自吳興乾化元年鏐酗酒殺人恐王罪之十月辛亥

殺都監潘長推官鍾安德奔于吳

吳越臨史叅資治通鑑

錢元瓘吳越王子也乾化三年湖州刺史

資治通鑑

吳越司賓使沈韜文湖州人有游西湖詩云菰米蘋花似故鄉不是不歸歸未得好花明月一思量武肅憫其

思鄉授以湖州刺史

古今詩話
詩遺一句

吳越王錢鏐卒子元瓘立內牙指揮使劉仁杞及陸仁章久用事為衆所惡一日諸將共請誅之元瓘喻之曰二將事先王久吾方圖其功汝曹乃欲逞私憾而殺之可乎吾為汝主汝當稟吾命不然吾歸臨安以避賢路衆懼而退乃以仁章為衢州刺史仁杞為湖州刺史

宋史

右統軍使胡進思湖州人開運二年十一月吳越王弘

佐出進思為湖州刺史既而復以他故留進思始末詳

載資治通鑑

進思高澧舊將也

談志

進思字克開妻杜氏子璟工部尚書

龔茂良靈昌廟記

錢僊年十八出為湖州刺史有妖巫登大樹恣為鬼神

語州人驚畏僊曰妖由人興命注弩而射巫果請命因

鞭之州人大服

吳越脩史浙江通志

錢儼字誠允倣異母弟本名信淳化初改焉開寶三年

代兄僊知湖州充宣德軍安撫使太平興國二年從俶
之請授新媯儒等州觀察使仍知湖州

宋史



吳興備志卷四

欽定四庫全書

史部
吳興備志卷五

詳校官編修_臣曹振鏞

檢討_臣德生覆勘

覆校官主事_臣龔敬身

校對官主簿_臣汪日贊

謄錄監生_臣李大綬

欽定四庫全書

吳興脩志卷五

明 董斯張 撰

官師徵第四之四

潘慎脩字成德莆田人歷知湖梓二州淳化中祕書監
李至薦之命以本官知直祕閣慎脩善奕棋太宗屢召
對奕因作棋說以獻大抵謂棋之道在乎恬默而取舍
為急仁則能全義則能守禮則能變智則能兼信則能
克君子知斯五者庶幾可以言棋矣因舉十要以明其

義太宗覽之稱善歷兩浙巡撫副使

宋史

齊廓字公弼會稽人舉進士歷知明湖舒三州積官光祿卿廓寬柔恭謹人犯之不校弟唐為吉州司理參軍嘗與賢良方正對策入等越州蔣堂奏廓及唐父母垂老窮居鄉里二子委而之官唐復久不歸省于是罷唐令歸侍養廓方使湖南雖置不問然士論薄之

宋史

丁度字公度祥符人累遷中書舍人時葉清臣請商州置監鑄大錢以一當十度奏曰漢之五銖唐之開元及

國朝錢法輕重大小最為折衷歷代改更法雖精密不能期年即復改鑄議者欲繩以峻法草其盜鑄昔漢變錢幣盜鑄死者數十萬唐鑄乾元及重輪乾元錢錢輕幣重嚴刑不能禁止今禁旅戍邊月給百錢得大錢裁十不可畸用舊錢不出新錢愈輕則芻糧增價臣嘗知湖州有抵茶禁者受千錢立契代鞭昔在京西有盜殺人取其敝衣直不過數百錢盜鑄之利不啻數倍何以禁止度叅知政事諡文簡

宋史

楊紘刑部郎中至和元年十一月視事轉兵部郎中

談志

紘字望之浦城人億從子為億後用廕補官歷江東轉運按察使屬歲饑開倉賑濟之吏持不可紘曰義倉為民也稍稽人將殍矣紘用法嚴急與王綽王鼎號江東三虎官至太常少卿平生集書數萬卷手抄

寔事名窺豹篇

宋史八
閩志

王駿字總之趙州人曹利用得罪駿以所厚出知湖州歷叅知政事知樞密天聖中駿嘗使湖北見曹瑋謂曰

君異日當柄政願留意邊防駿曰何以教之瑋曰嘗使人覘元昊狀貌異常他日必為邊患駿未以為然比再入樞密元昊反帝數問邊事駿不能對及西征失利議刺鄉兵又久未決駿出知河南府始嘆瑋之明識贈戶

部尚書諡忠穆

宋史

章岷字伯鎮司馬溫公有送章伯鎮知湖州詩江鄰幾有晚赴館宿覩吳興太守章伯鎮題壁記詩

岷以集賢校理知湖州

談志

岷浦城人舉進士與范仲淹同賦鬪茶歌岷詩先就

仲淹覽之曰此詩真可壓倒元白官至光祿卿

八閩通志

刁衍字元賓冀州大理寺丞獻文四十篇召試授殿

中丞通判湖州歷比部員外郎充崇文院檢討

宋史

衍後知湖州見郡志

胡宿字武平晉陵人知湖州歷樞密副使太子太師諡

文恭宿清謹忠寔內剛外和羣居不譁笑言必思而後

對故臨事重慎不輒發發亦不可回止居母喪三年不

至私室少與一僧善僧有祕術化金石為黃金且死將授宿使葬之宿曰後事當盡力他非所冀也

宿知湖州前守滕宗諒大興學校費錢數十萬通判寮吏皆疑以為欺不肯書歷宿謂之曰君輩佐滕侯久矣苟有過曷不早正乃陰拱以俟其去而非之豈昔人分謗之意乎坐者大慚謝其後湖學為東南最宿之力為多

西吳里語

嘉祐中鮑軻知湖州購秀州田十頃為學糧歲可食百

員

顧臨湖
學田記

軻永嘉人歷太常少卿

葉水心鮑
清卿墓志

徐起字豫之鄆城人舉進士終知湖州有善政

宋史

馬尋鄆州須城人歷兩浙轉運使歷知湖州州饑人或

羣入富家掠困粟獄吏鞫為強盜尋曰此脫死耳情與

強盜異奏得減死論著為例終司農卿

浙江
通志

馬尋字子正祥符初進士授吳江簿兄彛戒之曰到

任半載可誦律書為治民之本後彛至縣詰之荅曰

治在孔道疲于賓餞未暇及也彛不悅尋曰少緩期
諷之至冬果精律學繼登朝籍久叅法寺有平允之

譽累著治聲彛之力也

姑蘇志

謝泌字宗源歙州人少好學有志操第進士累遷殿中
丞獻所著文十篇古今類要三十卷召試中書直史館
進銀臺司出知湖州歷太常少卿判吏部銓卒年六十
三泌性端直為政有惠愛頗好方外之學疾草服道士

服端坐而逝

宋史

張昱之字景山滌人進士及第歷河北轉運使保州卒
殺通判石待舉為亂昱之自魏馳至城下召諸將部分
攻城平之後以事被謫歷知湖州以光祿卿致仕昱之
善吏事所至有聲

宋史

鮑當以職方員外郎知湖州有清風集一卷

談志

鮑當善為詩景德二年進士第及為河南府法曹薛
尚書映知府事當失其意初甚怒之當獻孤雁詩天寒
稻梁少萬里孤難進不惜死君庖為帶邊城信薛大

嗟賞不復以掾屬待之

溫公詩話

張田字公載澶淵人歐陽脩薦其才歷提點湖南刑獄
唐介與司馬光狀其傾險改知湖州歷直龍圖閣知廣
州田伉直自喜好嫚罵氣陵其下然臨政以清作欽賢
堂繪古清刺史像日夕師拜之蘇軾嘗讀其詩以侔古

庶吏云

宋史

盛中甫司封員外郎集賢校理嘉祐三年十月視事五
年十月罷治平二年五月再任

談志

申甫餘杭人叅政盛度子嘗為福建轉運使頗以修

潔稱

宋史
新編

陳亞字亞之揚州人慶厯三年以金部郎中知湖州仕至太常少卿近世滑稽之雄也嘗著藥名詩百餘首行于世若風月前湖近軒窓半夏涼棋怕臘寒呵子下衣嫌春暖宿紗裁及贈祈雨僧云無雨若還過半夏和師晒作葫蘆艸之類極為膾炙亞嘗言藥名用于詩無所不可或曰延胡索可用乎亞朗吟曰布袍袖裏漫懷刺

到處遷延胡索人此可贈游謁窮措大聞者莫不大笑

青箱雜記迂叟

詩話叅談志

亞喜蓄書家藏數千卷

見青波雜著

亞詩如浪平天接影山盡樹回身皆深得作者之格

又有惜竹詩云出檻亦不剪從教長瘦叢年年當盛

夏葉葉是清風句清格老皆此類

墨客揮犀

龐籍字醇之武城人仁宗朝歷同中書門下平章事以使相出知湖州累封潁國公謚莊敏籍曉律令長史事

治民頗有惠愛

宋史

按籍之守湖僅載沈括夢溪筆談及攷仁宗紀第云
皇祐五年龐籍罷知郢州籍本傳復云歷知并州青
州秀州闕州初未言涖湖也然存中嘉祐二年登第
莊敏事其所目擊者又家錢唐去吳興僅百里寧有
父母之邦而紀載舛錯乃爾豈托克托輩脩史時刪之
耶

唐淑問字士憲江陵人介子也第進士擢監察御史裏

行歷數中丞滕甫之短神宗以為邀名出刺復州歷知

湖州哲宗立司馬光薦其行已有恥召為左司諫

宋史

滕宗諒字子京河南人舉進士累遷左司諫坐言宮禁
事降知信州徙湖州問民疾苦省視風俗請胡瑗為教
授歷天章閣待制知蘇州宗諒尚氣倜儻自任及卒家
無積財所涖州喜建學而湖州最盛所著有諫疏二十

餘篇

宋史

宗諒在湖州進柑子詩仁宗賜獎諭勅書

談志

陳侗字成伯太常博士集賢校理知湖州

東林山志

侗莆田人富弼知汝州辟侗從事官至寶文閣待制

八閩志

孫覺字莘老高郵人熙寧二年詔知諫院王安石早與覺善驟引用之將援以為助青苗法行覺條奏其妄安石覽之怒出知廣德軍哲宗即位遷右諫議大夫論宰相蔡確韓縝進不以德擢御史中丞紹聖中以元祐黨奪官徽宗即位復之

宋史

莘老至歲適大水湖人饑將相率亡去莘老大振廩
勸分躬自撫循勞來出于至誠富有餘者爭出粟以

佐官所活不可勝計

墨妙亭記
薛文忠集

李常字公擇建昌人熙寧中為右正言疏言均輸青苗
歛散取息傳會經義何異王莽猥拆周官片言以流毒
天下安石見之遣所親密諭意常不為止落校理通判
滑州元豐中詔遷禮部侍郎哲宗立進戶部尚書所著
有文集奏議詩傳元祐會計錄常與孫覺齊名俱受知

呂公著其論議趨舍大略多同

宋史

常與覺皆知湖州歷中丞常黃庭堅母舅覺庭堅婦翁尤可異也公擇在吳興政尚寬簡日與賓客笑咏

吏民安樂之郡以大治

秦少游李公行狀

陸元光字蒙老長興人熙寧中進士歷吳興知州軍事朝奉大夫集賢院學士提舉南京鴻慶宮

東林山志參西吳里語

余中字行老宜興人熙寧五年偕兄貫試禮部中領選而貫黜請自黜以薦兄有司雖不許而士論嘉之次年

魁廷對紹聖三年使金還奏河朔城隍墮圯乞從密院
行下葺治以戒不虞宣靖間金人長驅直入城守多不
固議者始思其言以霅川守致仕

宜興志

章惇字子厚浦城人父俞徙蘇州惇初生時父母欲不
育浸以水盆後復育之熙寧初王安石悅其才為三司
使呂惠卿去位鄧綰論惇同惡出守湖州嘗以詩寄東
坡坡用其韵和之曰方丈仙人出淼茫高情猶愛水雲
鄉云云絳闕雲臺總有名應須極貴又長生云云前一

詩言其出渺茫而終貴顯後一詩言其好爐火而餌荻

苓皆善謔也子厚得詩不樂數日

宋史叅蒯坡叢話全詩入藝文

王異司封郎中充秘閣校理治平四年七月視事

談志

王介性輕率出守湖州荆公以詩送之云吳興太守美如何柳惲詩才未足多遙想郡人迎下擔白蘋洲渚正滄波其意以水值風起波也介喻其意遂和十篇盛意而頌于荆公其一曰吳興太守美如何太守從來惡祝鮀生若不為上柱國死時猶合代閻羅荆公笑曰閻羅

見闕請速赴任

東軒
筆錄

介字石甫常山人性強記負直氣累官至祕閣校理
與安石甚款未嘗降意相下初安石屢召不起後受
學士之命介以詩寄之有云草廬三顧動春蟄蕙帳

一空生曉寒盖有所諷云

石林
詩話

蘇軾元豐二年己未年四十四歲四月二十日到湖州
五月五日同王子立子敏及兒子邁徧遊湖城小城看
荷花作詩是月過賈耘老水閣作詩又次前韵耘老少

伎號雙荷葉作詞又至黃龍洞祈雨七月七日作文與
可畫簪簪偃竹記是月何大正舒亶李定言公作為詩
文謗訕朝政國子博士李宜之狀亦上七月三日進呈
奉旨送御史臺勘二十八日皇甫遵到湖州追攝過南
京張文定公上劄范蜀公上書救之郡人懷德作消灾

道場

東坡
年譜

皇甫遵追攝蘇軾在告祖無頗權州事

孔平仲謹
苑詳蹟微

唐詢字彥猷錢塘人以父肅任為將作監主簿天聖中

詔許天下士獻文章應詔者百數有司第其善者詢數人而已詔賜進士及第知長興縣工部員外郎直史館知湖州歷知制誥以叅知政事曾公亮親嫌出知蘇州從杭青二府進翰林侍讀學士進給事中贈禮部侍郎詢晚改節知湖州納官妓為妾好蓄硯著硯錄子垆宋史唐垆字林夫元祐八年以左朝散郎知湖州談志叅樓瀕跋唐林

夫父
子帖

唐垆以父任得官熙寧初上書云秦二世制于趙高

乃失之弱非失之強神宗悅其言又云青苗法不同
宜斬大臣異議如韓琦者數十安石尤喜之薦使對
賜進士出身為崇文校書上薄其人除知錢塘縣安
石欲留之乃令鄧綰薦為御史遂除太子中允數月
將用為諫官安石疑其輕脫將背已立名不除職以
本官同知諫院非故事也垠果怒奏二十餘疏論時
事皆留中乃因百官起居日叩陛請對至御座前搢
笏展疏目安石曰王安石近御座聽劄子大聲宣讀

凡六十餘條大畧以安石專作威福曾布等表裏擅
權天下但知憚安石不復知有陛下王珪曲事安石
無異厠僕且讀且目珪珪慚懼俯首元絳薛卣陳繹
安石頤指氣使無異家奴張琥李定為安石爪牙張
商彛乃安石鷹犬至詆為李林甫盧杞上屢止之垧
慷慨自若讀已下殿再拜而退侍臣衛士相顧失色
閣門糾其瀆亂朝儀貶潮州別駕鄧綰申救之且自
劾繆舉安石曰此素狂不足責改監廣州軍資庫

王安禮字和甫臨川人安石弟直集賢院出知湖州歷
尚書左丞安禮偉風儀論議明辨頗以經綸自任而濶
畧細謹常救蘇軾之獄劾舒亶策徐禧必誤國沮李憲

節度

宋史

刁約字景純天聖中進士蘇子瞻有答湖守刁景純書

載藝
文

約康定中與歐公同在館閣修禮書後直史館浩然
有山水志掛冠而歸築室潤州號藏春塢日游息其

中東坡題云年拋造物甄陶外春在先生杖屨中

族氏

大
全

景純與東坡同年舉進士熙寧中為於潛令軾倅杭
時行縣為賦野翁亭詩云有我來觀政問俗謠皆云
吠犬足生燄之句其行政惠利可見

杭州府志

間邱孝直字公顯元豐中知湖州嘗知黃州後致仕居

吳中東坡有水龍吟詞贈之

談志叅東坡全集

孝直一作孝忠見坡詩集註

晁補之字無咎鉅野人舉進士第一神宗閱其文曰是
深于經術者元祐初遷校書郎知湖州歸葬因自號歸
來子補之文章奇卓出于天成尤精楚詞集屈宋以來
賦咏為變離騷安南用兵著罪言一篇議者以為通達
世務

宋史

林希字子中長樂人元祐元年以集賢修撰知湖州歷
同知樞密院事謚文節

宋史叅
談志

林氏野史八卷林希撰希不得志于元祐起從章惇

甘心下問遷西掖草諸賢謫詞者也而此書記熙寧
元豐以來事頗平直不類其所為或言此書作於元祐
之前其後時事既變希亦隨之書藏不毀久而時事
復變其孫懋于紹興中始序而行之耳

文獻
通考

馬瑊字忠玉荏平人元祐中兩浙提刑歷湖北憲副紹聖
三年知湖州劾禮部侍郎朱服罷之累知荊州黃庭堅
自蜀出峽與瑊相從歡甚多酬唱庭堅與趙挺之有怨
挺之執政庭堅羈置宜州瑊坐庭堅善置海州

瑊一作
瑊忠一

作中宋史叅談志黃山谷年譜
崇城集西掖誥詞墨莊漫錄

張按忠玉以山谷故遠謫行中之竄亦坐從子瞻游
城之彈服殆兩賢相厄哉

王安上宣德郎紹聖元年視事

談志

安上字純父安石第七弟

見曾鞏王益墓志王
安石游褒禪寺記

安上嘗守和州見黃庭堅與郭英發書又歷江東提
刑見東軒筆錄按東都事畧王安石弟安禮以直集
賢院出知湖州未知訛安上于安禮抑兩人皆知郡

事而並傳歟候攷之

呂嘉問字望之壽州人崇寧元年以中大夫知湖州歷

戶部侍郎龍圖閣學士

宋史叅
談志

嘉問公弼從孫附安石惇卞致高位呂氏號為家賊
呂嘉問提舉市易務三司使曾布劾其違法荆公惑
黨人之說反以罪三司布既罷朝請而嘉問治事如
故劉邠聞而嘆曰豈應曾子避席望之儼然

章綽字子上浦城人樞密案之子也第進士為戶部員

外郎中書侍郎劉達之妻縉姨也達漸復元祐之政縉多贊之蔡京欲擠達且惡縉不附已使其黨攻之出縉湖州及京復相遂興制獄縉一門流竄張商英入相始辦其冤仕終龍圖閣直學士所著有蜀漢書浩堂類藁

行于世

宋史叅鴻慶集建寧志

章援浦城人惇子知湖州終校書郎

宋史叅談志

援字致平嘉祐四年進士見東坡答書

張詢字仲謀浦城人元祐中以佐朝請郎視事歲饑命

司錄邊裕賑之全活甚衆

詳曹希下

蘇軾嘗過吳興偕劉景文輩會碧澗堂軾為賦六客

詩遂以六客名堂焉

談志蘇文忠集姑蘇志

徐鐸字振文莆田人熙寧九年進士第一紹聖末以給事中直學士院蹇序辰建議編類元祐諸臣章牘事狀詔鐸同主之凡一事施行文書摭拾附著纖悉不遺遷禮部侍郎徽宗立御史中丞豐稷論鐸編類事狀率視章惇好惡為輕重存沒諸臣橫罹竄斥序辰既放歸田

里鐸之罪不在其下詔落職知湖州崇寧中拜禮部尚

書家

史

豐稷字相之鄞人元符元年以龍圖閣待制知湖州歷工部尚書嘗論蔡京曾布奸狀舉司馬光呂公著配享哲宗京得政除名徙建州高宗朝追復學士謚清敏初文彥博嘗品稷似趙抃及賜謚皆以清得名稷三任言責每草疏必密室退多焚藁未嘗以時政語人云

宋史
叅談

志

葛勝仲字魯卿丹陽人歷國子祭酒再知湖州時羣盜縱橫聲搖諸郡勝仲修城郭治戰艦閱士卒賊知有備引去歲大饑發廩賑之民賴以濟

宋史

勝仲歷太常卿承詔續太常因草禮三百卷謚文康

一統

志

梁端朝請大夫直祕閣建炎元年到任二年正月捕獲叛兵特恩轉中大夫三年以協助勤王陞直龍圖閣

談志

曾紆字公卷南豐人有志節建炎間常力勸湖州郡

將梁端起兵勤王官至直寶文閣知衢州

一統志

曾紆工詩詞號空青先生布第四子也汪彥章志其墓云公才高識明悟及書史為家賢子弟以文章翰墨風流蘊藉為時名勝以精明強力見事風生為國能吏

氏族大全

盧秉知渭州守邊久以父老乞歸移知湖州未至復詔

還渭

宋史詳人物徵

宇文時中紹興六年十一月以左中奉大夫直寶文閣

視事談

志

時中蜀廣都人兄左丞粹中樞密虛中時中賜進士

第後以直龍圖閣知漢川

費著蜀氏族譜

鄭滋字德象福州人知湖州

郡志

趙明誠靖康二年秘閣修撰知江寧府仍兼江南東

路經制使改湖州

應天府志

明誠字德甫密州諸城人故相挺之子也所藏三

代異器及漢唐前後石刻為目錄十卷辨證二十卷

紹興中其妻易安居士李清照表上之

洪适
隸釋

易安有祭湖州文云白日正中嘆龐翁之機捷堅城

自墮憐杞婦之悲深

四六
談麈

嘗怪德甫歷官二千石好古博雅史不立傳又不附
其父清憲公僅于李格非傳後因妻以見名建炎已
酉被旨知湖州郡志莫攷復從易安金石錄後序祭
湖州文及應天府志知之豈以未嘗蒞任乎何湖州
之文名灼人耳目也雖然有妻能文免全秋草嗜奇

者得焉更侈為勝談也

元衢

周常字仲脩浦城人熙寧六年進士第以所著檀弓義見王安石安石稱之補太常博士歷中書舍人禮部侍郎蔡京用事不能容以寶文閣待制出知湖州尋奪職

八閩通志
建寧府志

李光字泰發上虞人知湖州歷吏部尚書叅知政事泰檜以親黨鄭億年為資政學士光于榻前面折之因曰觀檜之意欲盜弄國權懷奸誤國不可不察檜大怒明

日光引去高宗曰卿昨面叱秦檜朕退而嘆息方寄卿腹心何乃引去光曰臣與宰相爭不可留章九上除資政殿學士後安置瓊州孝宗朝謚莊肅光有易傳十卷

宋史

陳與義字去非洛人知湖州高宗如平江拜翰林學士尋叅知政事時趙鼎言中原有可圖之勢宜便進兵上曰今梓宮與太后淵聖皆未還若不議和則無可還之理與義曰若和議成豈不賢于用兵萬一無成則用兵

必不免既而從帝如建康扈蹕還臨安以資政殿學士
再知湖州提舉洞霄宮與義平居謙以接物然內剛不
可犯其薦士于朝退未嘗以語人士以是多之

宋史

陳與義紹興二年轉大中大夫知湖州陞辭上勞問
甚渥且云姑遂雅志行復用卿矣于是公疾益侵遂
請閒是年十一月薨于烏墩之精舍詔贈特進令有
司給葬事葬湖州歸安縣上強里之岩山

張嶠陳君墓志銘

常同字子正臨邛人紹興初乞郡得彬州召還首論朋

黨相攻，泰成禍患。今國步艱難，而分朋締交，背公死黨者，固自若也。上曰：朋黨亦難破。對曰：朋黨之結，蓋緣邪正不分，但觀其言行之寔察，其朋附之私，則邪正分而朋黨破矣。四年，除中書舍人、史館脩撰。先是，同嘗上疏論神、哲二史，悉出一時奸人之論，望精擇。史館修定上嘉納，至是命同修撰。七年，擢御史中丞，顯謨閣直學士，知湖州。

宋史

同在湖州郡有賢明之謠，復召請祠，貧無立錫，寄居

海鹽天寧僧舍十年自號虛閒居士卒贈少師諡忠

毅

海鹽志

朱勝非字藏一蔡州人建炎中同中書門下平章事時
員外郎江端友請營宗廟議者謂國家期于恢復不常
厥居勝非方主和議遂白上營宗廟于臨安時御史魏
矼劾罷之紹興五年起知湖州引疾秦檜得政勝非遂
廢居卒諡忠靖

宋史

王欽字承可分寧人以父蔭歷官敷文閣直學士知湖

州

南昌府志

勾濤字景山成都人除荆湖北路安撫使知潭州秦檜嘗令人道意欲與共政濤以書謝之檜諷言者劾濤不報濤疏論時事之害政者有五帝嘆忠直賜繒綵茶藥秩滿與祠久之帝謂檜曰勾濤久閒性喜泉石可進職與一山水近郡檜對永嘉有天台雁蕩之勝帝曰永嘉太遠其以湖州命之俄卒年五十九

宋史

汪思溫字汝直鄞人吳興擇守有言公三衢治狀者除

直徽猷閣知湖州吳興地汙下故有溝以走潦水而並
溝之居歲久填淤或置屋其上遇甚雨則水及半扉公
按尋道跡撤屋除地復還故道水患遂除歷太府少卿

直顯謨閣贈少師

孫覲汪公誌樓鑰安康夫人
狀及朝議大夫王正己志

周葵字立義宜興人紹興中為侍御史欲奏論戶部尚
書梁汝嘉汝嘉致辭于秦檜出葵知湖州檜蓄怒未已
又易平江值兩浙運使李椿年行經界法欲增田租三
十萬葵辨其不可忤椿年椿年還都希檜意奏葵罷之

居間十五年後歷官叅知政事著聖傳詩三十篇文集

三十卷奏議五卷晚號惟心居士諡簡惠

宋史浙江通志一云字惇

義

趙不迹鉛山人

太宗

世孫隆興元年進士知湖州

鉛山

志

蕭振字德起温州人入太學登進士歷監察御史振本

趙鼎所薦後因秦檜引入臺除徽猷閣待制知湖州將

行白檜曰宰相如一元氣不可有私私則萬物為之不

生檜不悅振至州檜欲取羨餘振遺檜書謂財用在天下如血氣之在一身移左以寔右則病矣檜屬以私事又不克盡從以親老乞祠許之後知成都府安撫制置使帝嘉振治行謂宰相曰四川善政前有胡世將今有蕭振振有文集二十卷

宋史

胡文修字已懋晉陵人登崇寧進士授泰州推官試詞學兼茂科給事中翟汝文同知貢舉得其文曰非吾所能及也置之首選歷右文殿修撰知湖州終兵部尚書

翰林學士

宋史晉陵志

宗愈至交脩世將皆在禁林中興以後學士三入者

自交脩始交脩衰次為書號曰世絲綸集

宋史

王師心字與道金華人政和八年進士知湖州救水旱

饑荒仕至宣奉大夫贈少師諡莊敏

談志

汪藻字彥章饒陽人舉進士第一紹興中藻言自元符以來並無日厯此國之重事願留聖心上納之既而宰執請擇所付上曰無以易藻矣出知湖州詔領日厯如

故辟官屬二員且賜史館修撰餐錢後以郡人顏經授

甌訴其數糶軍實遂貶秩

言行錄
參宋史

藻通顯三十年無室廬以居博極羣書老不釋卷尤

喜讀春秋左氏傳

宋史

藻前後典六州先惠愛重名教有古循吏之迹守湖
朝廷和糶米六萬斛公視湖六縣民力所堪鑄三之
一而上書自劾詔勿問居歲餘除戶部被旨降本錢
復糶數萬斛歲適大稔物估自當如數而辦例進一

官公曰吾常以減糴待罪得蒙恩貸今豈可復受賞

耶三辭卒不拜

孫仲並
汪公志

秦梓字楚材登進士歷知台秀表太平常湖六州除翰

林學士出知宣州民請留再移湖州告老贈光祿大夫

莒
記

秦檜弟梓兼崇政殿說書每除言路必侍經筵後以

端明知湖州進大資致仕

宋史職
官表

秦棣紹興十三年二月以右朝奉郎充集賢修撰視事

談志

許搏莆田人宣和中在太學時秦檜弟棣犯學規王希亮充直學申堂司檜折簡為棣援搏曰事到堂上

豈容私檜怏怏而去

八閩志

張按吳興南渡股肱郡也鎮茲土者前乎弟乎檜者後乎弟乎檜者目中猶有趙哉危矣

張宇字泰定晉陵人紹興十四年移知湖州治道清淨不事聲華整齊大體濶畧細故不治苞苴奉權貴不飾

厨傳稱使客奉治循理期于不擾至今以愛利為人所

思

孫仲並
張公志

汪勃黜人紹興二年登第歷官權參知政事尋以端明
殿學士領外祠後起知湖州為政安靜不事鞭扑未嘗
妄費一錢民至鋟木為語揭于家曰賢哲太守福壽千
秋天子間之進秩三等

汪勃建炎十九年簽書樞密院檜黨也

見宋史

朱敦儒傳云諫議大夫汪勃希檜意劾之南畿志云

勃與檜異數志家曲筆耳

勃字彥及知湖州廉儉至骨不費公使一物內屏燭
反燃以代燎政以慈愛為主勸兩訟勿爭詞致殷重
其人感悅合掌結歡而散雪上相語莫激惱這佛

葉水

心汪
公志

曾逮字仲躬其先贛州人徙河南禮部侍郎文清公敏
之子也能世其家淳熙中歷知湖州終敷文閣待制

文獻

通考叅宋史
河南志談志

紹興末有韓慥者賣卜臨安多奇中曾侍郎仲躬嘗詣其肆問之慥曰命甚佳有家世有文學有政事亦有官職只欠一事終身無科第耳仲躬累舉進士不

第竟以廕至從官

癸辛雜識

水待問永嘉人隆興元年省元狀元光宗時知湖州尋

以引嫌改知婺州

見攻媿集

王正己字伯仁鄞人歷荆湖轉運判官移知湖州未半

年罷版曹以全年通欠奏正己鐫兩秩不辯也尋除廣

南運判歷祕閣修撰正己剖符數郡所至無聚斂省鞭
扑薦舉必公按刺至寡而端毅簡默望風畏之藏書至
二萬卷手抄為多號酌古居士

攻媿集

王炎字晦叔婺源人乾道五年進士歷吳興郡王府教
授改知湖州湖甲浙右素號難理炎不畏強禦邸第貴
介有撓法者炎注于牘曰汝為天子親亂天子法炎為
天子臣正天子法浙右人多誦之竟以謗罷炎初著易
解未竟病革夜分祝天願須臾無死以成書卒如其言

胡升王
大監傳

程克俊字元籲浮梁人宣和間進士調湖州刑曹改太學錄被薦召對論事訐直擢給事中歷端明殿學士兼權叅知政事上曰如卿數人可致太平以疾辭得祠起知建康改湖州召拜叅知政事紀綱振舉謚章靖所著

有易通解詩文諸書

饒州府志

盧襄靖康元年以徽猷閣待制知江寧府改湖州

應天府志

襄字贊元三衢人錦繡萬花谷載襄西征記一卷盧

贊元宣和末為吏部侍中詩篇極多嘗得其數十篇
皆清拔可喜尚記其贈鼓琴者曰試將鍾子山水意

一洗退之冰炭腸

庚溪
詩話

張震字彥亨歙人知湖州踰年公私富羨乃捐府帑八
萬緡代倚郭烏程歸安兩縣民輸免丁錢一年又餘九
萬緡為餘邑代輸罷四安鎮商稅置酒坊以補課額政
聲籍甚官至朝議大夫

歙
志

王十朋字龜齡樂清人自夔州移至湖州召對劉珙請

留之上曰朕豈不知王十朋顧湖州被水非十朋莫能
鎮撫至郡戶部青苗虛逋三十四萬命吏持券往辦不聽
即請祠去起知泉州十朋前在湖割俸錢卹貢院又為
泉建之尤宏壯凡歷四郡布深恩恤民隱士之賢者詣
門以禮致之所至人繪而祠之饒久旱入境雨至湖積
霖入境即霽凡禱必應其至誠不獨感人而亦動天地

鬼神

宋史

陳之茂字草卿無錫人為太學生與張九成同廷對之

茂所對忤權相黜之九成第一叩頭殿堦曰陳之茂能
言人所不敢言宜獎不宜黜高宗覽對悚然曰忠言也
賜同進士出身經學為諸儒倡以左承議知湖州仕至

吏部尚書

一統志
參勞志

趙伯驪字希遠太祖七世孫以父任補承節郎監湖州
商稅歷浙西提刑蘇湖缺守皆公兼攝晝夜服勤庭無
留訟潔已裕民財用贍足吳興學生犯法公命教授答
以學規其愛惜士類如此或得盜賊囊橐治不少恕特

轉和州防禦使伯驢博洽蘊藉長于歌詩自號無隱居

士

周必大趙公神道碑

趙師夔字汝一嗣秀王伯珪子直徽猷閣知湖州時歸附從軍而廩于湖者衆不能給師夔請增廩仍別給僦屋錢以安其心帝稱善詔諸將行之郡宅東舊有燕堂

師夔改名晝錦贈新安郡王諡恭榮

宋史

孟浩字養直宜春人乾道五年進士歷國子監丞出知湖州以忤權貴罷後復起官至直祕閣所至捐廩不妄

取予強明精敏洞見事情為文章有法度所著有廳坡

集

袁州志

鄭作肅字恭老蘇人宣和三年進士知湖州隆興二年
歲歉民貧有生子不舉棄于道路者作肅命屬官尋訪
收取又擇乳母為之保養月給贍米一石委請學官專
莅其事條其事目刻石州縣遂為其邦著令

姑蘇志

董草知湖州歷右朝奉大夫司農少卿

勞志

顏度字魯子居崑山以文章政事名一時乾道五年知

長興縣遇事慈恕以善惡福應之說喻人人不忍欺其
聽訟于淳朴中出智計以得其實聞者稱為神明一日
某王自寧國入朝舟次縣界皆以婦女挽轡王怪問之
皆云知縣顏佛子愛惜民力縱男子耕種卒難招集恐
累顏公故婦女悉當其役洎入對孝宗問卿治得人乎
即以度對未幾召為監察御史累遷知湖州以中大夫
秘閣修撰提舉冲祐觀封長洲縣男度與朱熹友善孝
宗謂度每出一言不動如山因以如山自號焉

蘇志

林栗字黃中福清人乾道六年以直寶文閣知湖州歷
兵部侍郎謚簡栗為人強介有才而性狷急欲快其私
忿遂至攻詆名儒廢絕師教雖疇昔論事雄辨可觀不
足以蓋晚節之謬也

宋史新編
叅談志

王十朋梅溪序云林黃中少卿出守吳興芮國器司
業有詩送之

王信字誠之麗水人歷太常少卿太史奏仲秋日月五
星會于軫信言休咎之數史策不同然五星聚者有之

未聞七政並集也分野在楚願思所以順天而應之因
條上七事信遇事剛果論奏不避權要上亦虛心延訪
並抗志不回由此人多疾之信亦力求去起知湖州擢
浙東安撫使所著有是齋集

宋史

楊恕字可久丹徒人權知湖州

劉漫塘集

薛季宣字士龍永嘉人事表漑漑嘗從周敦頤學盡以
其學授之季宣既得漑學于古封建井田鄉遂司馬法
之制靡不研究講畫皆可行為大理寺主簿嘗言于孝

宗曰齊威之伯不在阿即墨之誅賞而在毀譽者之刑
臣觀近政柰何毀譽之人自若乎又言近或以好名棄
士大夫夫好名特為臣子學問之累人主為社稷計惟
恐士不好名誠人人好名畏義何鄉不立帝稱善恨得
季宣晚除大理寺自是凡奏請論薦皆報可以虞允文
諱闕大不樂之居七日出知湖州季宣于詩書春秋中
庸大學論語皆有訓義藏于家其雜著者曰浪語集
宋史
趙粹中密州諸城人歷吏部侍郎嘗論王安石奸邪當

罷從祀後知池州有善政乾道六年移知湖州挽留者

繫道不絕

樓攻媿趙公神道碑

鮑瀟字清卿乾道六年進士知湖州

永嘉縣志

單夔錢塘人乾道八年以右奉議郎視事官至侍從

王回字亞夫瑞安人初入太學名聲彰徹登紹興甲戌

第歷直徽猷閣浙西提刑改知湖州除江東提刑以疾

請老再得祠祿積官至朝議大夫湖士夫淵林也公以

耆德鎮之上下悅服又訪郡之大利修湖濠增城堞建

利濟院有盜夜殺牛牛逸訴烏程尉尉不省復訴歸安尉尉視之漠然牛怒觸人無敢近者尉聞于州公遣卒傳呼示以判事牛即俯聽盜竟得云聞者異之或歌之曰謂牛不能言何以訴其冤謂牛而善觸何以俯而伏信及豚魚疇不曰迂牛聽公令不顯公政公嘗曰吾有三不欺一曰君二曰人三曰已初視峴山晚卜築峴河自號峴河居士在湖州朝廷方欲用之而求去並切既憲江東歸至峴河摩挲鄉曲問訊舊喜不自勝居無何移

疾乞掛其冠云

楊萬里王
回墓志

吳守趙希蒼字漢英初至損稅斂增學廩親不葬女不

嫁廢疾無醫死無斂皆助之如不及

葉水
心集

希蒼伯驢孫見周必大神道碑

張杓字定叟綿竹人浚子也兼攝蘇湖二州有執政姻
黨閉糴杓首治之歷知臨安府吏部侍郎杓天分高爽
吏才敏給遇事無滯隨宜變通所至以治辦稱南渡來

稱京尹者以杓為首

宋史西
吳里語

張忠恕字行父浚孫開禧末為籍田令屬太廟鴟吻為
雷雨所壞神主遷御忠恕因輪對請廣言路通下情寧
宗嘉納嘉定五年進太府丞出知湖州魏了翁嘗勉忠
恕以植立名節無墜家聲及是嘆曰忠獻有後矣又因
輪對引伯父栻告孝宗之語曰當求晚事之臣不求辦
事之臣欲求仗節死義之臣必求犯顏敢諫之臣魏了
翁嘗許張忠恕惓惓體國似浚撥繁剗劇似其父于欽
華就實則有志義理之學嘗有聞乎栻之教矣

宋史浙
江通志

公在湖州治勢家門卒之暴民者逮復湖學以振士

風蠲下戶積逋凡泉帛續粟之征為效甚夥

魏鶴山集

楊長孺字伯子秀水人萬里子以蔭補知湖州清訟獄折強橫人稱神明與秀邸相持譖之間要錢否曰不要寧宗曰不要錢是好官真德秀入對寧宗問當今庶吏對曰楊長孺當今庶吏也尋改贛州端平中以理宗之立非正累召不起以集賢殿修撰守中大夫致仕號東

山潛夫有東山集

贛州志叅考
亭淵源錄

趙善湘字清臣宋宗室知湖州歷江淮安撫制置使天水郡公有易或問續或問指要學易補過洪範統論中庸大學論語孟子解老子解春秋三傳通議詩詞雜著百

餘卷

宋史

徐定字德操晉江人徙永嘉守湖州

永嘉縣志

吳曇慶元丙辰進士歷知湖州

泰順縣志

求承祖字子紹朝散大夫兵部郎中賜紫金魚袋知湖

州在任十有一月除沿海制置使叅議

嶧志

汪泳字伯游休寧人歷將作監部言王者仁政必自均

力役始累知泰湖處三州封江寧縣男

新安文獻志

衢按泳晚居烏程見徐長谷汪友山志

虞儔朝奉大夫直秘閣紹興五年十二月視事

談志

儔寧國人隆興初登第孤介不苟淳熙中任湖學教

授萬姓統譜

周夢祥麗水人淳熙甲辰進士知湖州

括蒼彙紀

趙立夫字德成樂清人登開禧第知湖州

兩浙名賢錄

天台宋濟仲楫為湖州日更立諸坊扁左題曰守臣宋

濟立未幾濟王變作或以為先識

齊東野語

紹定二年李全攻泰州知州宋濟迎降之

通鑑續編

按濟無他可攷見觀此其人不足道矣

寶慶元年正月湖州潘壬起兵立濟王知州謝周卿率

官屬入賀

通鑑續編

壬含山狂士也見齊東野語

潘壬之變寓公王元春告變于朝事平改湖州為安吉

州王元春以告變功遂知鄉郡

齊東野語

王邁為浙西安撫司幹官考廷試詳定官王元春欲

私所親寘高第邁顯摘其謬元春怒嗾諫官李知孝

劾免調南外睦宗院教授

宋史

項公澤字德潤紹定進士知吉州安吉州潮州俱有政

聲

瑞安縣志

趙必槐歷太府簿司農丞知安吉州入為金部郎復以

直秘閣知徽州能修其官始終不掛吏議

永嘉縣志

陳淳祖字道初瑞安人嘉熙戊戌進士浙西水以倉節

兼知安吉州賑恤有方列城安堵

兩浙名賢錄

廉弇字仲昭平江人差知安吉州兩易知吉州所至吏

不能欺豪右屏迹

蘇州志

林存字以道閩縣人寶祐初知湖州五年十月自吏部

侍郎簽書樞密院事六年十一月罷知建寧府

談志參宋史宰

輔表

孟淳字君復珙之孫也父兵部尚書之縉舉神童寶祐

二年知寧國有祭梅都官文謚文敏淳幼強記亦號奇

童年十二襲父廕歷浙西安撫使轉湖州路總管謚康

靖洪焱祖稱淳賢而文長于吏事

東林山志

劉震孫嘉熙元年八月以承議郎視事

勞志

震孫字長卿號朔齋中州人歷中書賈似道創公田

震孫與京尹魏克愚湖邊唱和詞語仍犯時忌隨命

劾去之

齊東野語

謝夢生字性之永嘉人少力學與陳埴葉味道為同志

友聖經賢傳靡不研究由是所得沛然有餘下筆疊疊不休名重當時趙善得亟稱之以女妻焉登嘉定癸未第歷樞密院編修官兼都官郎出知安吉州召為宗正丞兼戶部郎改秘書丞知汀州以疾致仕卒弟挺之同

登第終通判安吉州

永嘉縣志

楊纘字嗣翁知安吉州嘗刻張先安陸集于郡齋

陳振孫張

氏十咏
圖跋

嗣翁精于琴理見戚輔之佩楚軒客談

趙良淳字景程汝愚曾孫少學于雙峯饒魯以廕三遷至淮西運轄咸淳末廷臣議建宗室于內郡以為屏翰遂除知安吉州先是知州李庾遁百度隳廢良淳至與察吏論所以守禦之備悉舉行之歲饑民相集為盜所在蠭起或請以兵擊之良淳曰民豈樂為盜哉歲艱剽掠以苟活耳命僚屬以義喻之衆皆投兵散歸其不歸者衆縛以獻有掠人貨財者詣其主謝過而還之又勸富人出粟以賑語人曰使太守身可以濟民亦不惜也

其言懇懇足以動人人皆倒囷應之朝議以徐道隆為浙西提刑以輔良淳加良淳直秘閣文天祥去平江潰兵四出剽掠良淳捕斬數人梟首于市兵稍戢范文虎遣使持書招降良淳焚書斬其使元兵迫獨松關有旨趣道隆入衛道隆既去率衆城守夜宿陴上先是朝廷遣將吳國定援宜興不敢往乃如安吉願留為輔良淳見其慷慨大言意其可用請于朝留戍安吉已而國定開南門納元兵兵入城呼曰衆散元帥不殺于是衆號

泣散去良淳歸府兵士止之曰事至此侍郎當為自全計良淳叱去之乃閉閣自經有兵士解拯之復蘇衆羅拜泣曰侍郎何自苦逃之猶可求生良淳叱曰吾豈逃生者耶衆猶環守不去良淳大呼曰爾輩欲為亂耶衆涕泣出復投繯而死

宋史

按浦志載良淳大畧其立身之大節居官之善政臨難從容就死之義俱不明白又誤以趙鼎發節義成雙之事入于傳內特取宋史本傳節其文而錄之以

正舊志之譌且以風厲後人焉

顧應祥長
興志辨証

元馬煦字得昌磁州滏陽人至大元年守湖州煦在湖
富商有傭舟師至他郡者溺死或嗾舟師妻訟商殺其
夫冀得賄商不與又不賄吏吏誣商成獄又有二人同
市飲者後三日其一人死既葬或訴死者子訟同飲者
不賄吏吏亦誣之成獄公曰無死法訊之得實遂釋之
其精敏平允類如此富家私田跨縣邑資無筭援結大
官貴人如平交氣勢出守令上遠甚析其戶役為數十

其等在最下賦役常不及已而中下戶反代之供輸莫敢問公因買絲之役會而均之遂無所逃鄰郡多法焉胡安定先生墓見奪于何山浮屠公遷之高原而祀之置守塚二家撤淫祠二百區興學校築塘濬嚴保伍懲豪縱蠲煩擾皆有成法三年召拜刑部尚書

虞集馬公碑

趙全

闕

寧人元初由軍功膺寵及下江南授懷遠大將

軍湖州路總管至元二十年改平江

姑蘇志

王虎臣言平江路總管趙全不法世祖命虎臣往按

葉李執奏不宜遣虎臣帝不聽趙承旨奏曰趙全固
當問然虎臣前守此郡多強買人田縱賓客為姦利
全數與爭虎臣怨之虎臣往必將陷全事縱得實人
亦不能無疑帝悟乃遣他使何氏語林
衢按研北雜志虎臣守湖毀貢院為軍砦至昇先聖
像棄水中人無不唾罵其人可知矣

淳祐中蔡節知湖州即城西官地建書院祠安定

見牟應龍

郝侯
祠記

唐伯剛至正二十四年夏來牧湖郡建府學在子城之

東

見教授
方安記

高謙字舜臣磁州人兼習儒吏釋褐將仕佐郎歷湖州

路總管致仕加吏部尚書纂述格律百八十冊

彰德府志

張峒崇德人湖州府尹

崇德志
詳邑令

楊訓文潼川人元淮海書院山長遇亂不能去居江都


吳元年徵為起居注上稱訓文謹厚諭令始終一致兩

遷中書省左司郎中改太常卿知湖州府移至汀州入

禮部與陶凱同為尚書已而改戶部出為河南行省叅

政洪武五年卒訓文學行政事有名

吾學編



吳興備志卷五

欽定四庫全書

史部

吳興備志卷

七

詳校官編修_臣曹振鏞

檢討_臣德生覆勘

覆校官主事_臣龔敬身

校對官主簿_臣汪日贊

謄錄貢生_臣李玉瓚

欽定四庫全書

吳興脩志卷六

明董斯張撰

官師徵第四之五

郡丞

治中

別駕

長史

司馬

通判

同知

推官

晉庾翼字季恭吳興郡丞歷安西將軍荊州刺史謚曰

肅

翼為丞見顏魯公傳

齊傅琰由武康令除吳興郡丞

南齊書
詳邑令

唐李澥字堅永趙郡人天寶中進士佐晉陵吳興丹陽

三郡歷尚書郎柱下史其佐郡也廉使輒移其守以避

澥大率以古良二千石之理為之

穆員外刑部郎中
李府君墓志

按志夫人盧氏至德二年九月乙亥捐于吳興郡長

史之館

盧承禮范陽人李憇隴西人並湖州司馬

唐宰相
世系表

岑况鹽官人湖州別駕

韓朝宗京兆人初歷左拾遺諫睿宗作乞寒胡戲歷山

南東道採訪使開元末海內無事訛言兵當興衣冠潛

為避世計朝宗廬終南山為長安尉霍仙奇所發貶吳

興別駕朝宗善識拔後進嘗薦崔宗之嚴武于朝當時

咸歸重之

新唐書

此朝宗即李白時所謂但願一識韓荊州者廣輿記

以為名會不知會乃愈之兄因其字合名而悞合為

一人耳

元衢

李洪前御史中丞自河北負譴遇恩再移為湖州長史

素知畫公精于佛理因請益焉先問宗源次及心印公

笑而後答

皎然詩式

蕭憬蘭陵人朝散大夫湖州司馬

穆員外蕭公墓志唐宰相世系表名文

憬

獨孤嶼洛陽人湖州別駕

獨孤及毘陵集

裴懷儉河東人歷湖州治中

張說在君
神道碑

馮昭泰字遇聖長樂人歷湖州長史東濕不回聚蚊交

訕貶為饒州司馬遷括州刺史贈工部尚書

張說馮公
神道碑

薛同河東汾陽人官湖州長史贈刑部尚書即湖州刺

史戎之父也

韓文公薛
氏墓志

張幸元和間湖州長史

白樂
天集

薛卿教量移湖州別駕

見皎
然集

乾寧三年水部郎中何迎表薦朱朴為相驟遷至右諫

議大夫四年朴貶迎亦貶湖州司馬

資治通鑑

封特卿為湖州軍倅與同年李大諫詩酒唱酬以疾阻歡及愈有詩曰已負數條紅畫燭更辜雙帶繡香毬白

蘋洲上風烟好扶病須拚到後籌

詩話總龜

戶部尚書封敖渤海蔣人子彥卿望卿從子特卿皆

進士及第咸通中歷位清顯

舊唐書

衡按唐宰相世系表特卿字亞公

刁衍字元寶太祖時通判湖州上疏請定天下酒稅額

修郡縣城隍條約牧宰除兩浙丁錢禁汴水流屍凡五

事

浦志
書史

王堯臣字伯庸虞城人舉進士第一歷陝西安撫使有
能名拜叅知政事謚文安改謚文忠先是天聖五年
堯臣釋褐將作監丞通判湖州是年狄齊始投拱聖營
為卒晚年同入樞密院齊為使堯臣副焉

宋史叅東
軒筆錄

周延雋字仲章通判湖州

王安石集有送周都官判湖州詩又送周仲章使君

云看君東下雲溪船即都官也梅堯臣亦有詩送之

延雋見

談志

胥偃歷翰林學士以文章取高第以清節為時名臣為人沈厚周密其居家雖燕必嚴不少懈

歐陽修胥氏夫人墓誌偃即修婦翁也偃嘗通判湖州見談志

偃字安道長沙人進士甲科累遷知制誥學士

宋史

胥偃未仕時家有良田數千頃既貴悉以與族人嘗

與謝絳受詔試中書吏而大臣有以簡屬偃不發視而焚之且曰發而言之不亦傷刺薄乎

厚德錄

李軻四預鄉舉慶歷六年釋褐授湖州長史仕晚位卑

石徂徠集

見黃氏日抄

按郡志軻歸安人進士

胥元衡字平叔偃子也少以蔭為將作監主簿六遷為殿中丞鎖廳應進士舉得出身又三遷為尚書都官員外郎通判湖州

曾鞏胥君墓誌

蘇舜欽字子美銅山人少慷慨有大志當天聖中學者
為文多病對偶獨舜欽與河南穆脩好為古文范仲淹
薦為集賢校理隨以事為王拱辰所中出為湖州長史
坐放廢寓湖中讀書特發憤為歌詩豪放驚人每酒酣
草書爭為人所傳及謫死人多惜之

浙江通志

郡志載而不詳舜欽未嘗蒞任錄此正之

章衡字子平浦城人嘉祐二年進士第一通判湖州直
集賢院改鹽鐵判官同修起居注物有掛空籍奏請蠲

之三司使忌其能出知汝州歷集賢學士

宋史

薛長弼字元卿絳州亞平人太子右贊善大夫歷通判

湖州

歐陽修
薛君志

黃炎字晦之雋郡人博學能文十二歲咏日以況志弱

冠登嘉祐八年進士試鴈門令新法坐罪罷平生清介

與孔毅甫孫介夫曾子固厚善嘗著安邦論未竟有旨

差充四川廉訪使復任朝散郎通判湖州

贛州府志

張太寧通判湖州

見談
志

太寧嘗為大理丞見沈邁西溪集

求元忠字正國崇寧二年進士朝奉大夫通判湖州軍

事

嶼志

左譽字與言大觀三年進士湖州通判陳侍郎公輔銘

其墓

臨海縣志

陳能千字勉仲浦城人以行藝貢辟雍政和中登第通

判湖州遷員外郎

建寧志

許將閩人通判湖州

詳見曹纂

周執羔字表卿弋陽人宣和六年進士第二授湖州司
士曹事紹興五年通判湖州歷禮部侍郎孝宗患人才
難知執羔曰今一介不進亦蒙賜召口舌相高殆成風
俗豈可使之得志哉上曰卿言是也拜尚書侍讀執羔
有雅度立朝無明背治郡廉恕有循吏風

宋史

陸時雍淳安人幼孤貧與兄力樵養母稍長補郡學生
念母兄食不給語掌膳曰吾日飯勿盡炊願輟一膳遺
母自以一膳分為晨午其苦節孝養如此後登宣和進

士第中博學宏詞科通判湖州歷秘書丞復請以恩官

其兄子

談志通判題名
參大明一統志

張燾字子功德興人宣和中進士第三李綱為親征行

營使辟燾入幕綱罷燾亦貶建炎初通判湖州明受之

變賊矯詔俾燾撫諭江浙燾不受歷兵部侍郎排和議

出帥蜀自蜀歸卧十有三年秦檜死除吏部尚書謚忠

定

上

建炎元年以張燾通判常州改湖州賜緋衣銀魚二

年詔頒巡社法於東南聽民自脩器械結隊伍燾上

不便者十六事卒罷之

周必大張忠定公神道碑

鄭泰汴人紹興中以進士判湖州遂家德清

見徐天目鄭望溪傳

安僖秀王子偁高宗族兄也宣和元年舍試合格調嘉

興丞是年子伯琮生後被選入宮是為孝宗子偁召赴

都堂省察改宗教郎通判湖州

宋史

按談志子偁添差湖州通判

江都仲并字彌性紹興壬子進士晚丞光祿寺并嘗倅

湖籍中有所盼為作生朝青詞好事傳誦之坐謫官其
訓詞畧曰爾為瀆侮之詞曾不知畏天其知畏吾法乎

并有浮山集十六卷

文獻
通考

賈廷佐字子埜真定人隨蹕南渡紹興二年進士遷大
理司直時秦檜主和議廷佐誓以死爭忤秦檜意出通

判湖州和議成廷佐奉祠而歸

東陽
縣志

林霆通判湖州鄭樵為作芹齋詩云湖州別駕林三省

掛却朝冠便自由

詳藝
文

林寔字時隱莆田人擢進士博學深象數與鄭樵為金石交聚書數千卷皆自校讎謂子孫曰吾為汝曹獲良產矣紹興中為勅令所刪定官力詆秦檜和議

掛冠去當世高之

宋史新編

宋宗說新安人雪川倅

李以申宋尚書傳

徐夢雷嘉定十六年武舉仕至湖州倅

東陽邑志

李友直字叔益餘姚人史浩壻淳熙二年進士補通判婺州改湖州程大昌曰友直澄之不清撓之不濁淵乎

似有道者莫叔光謂如美玉無瑕可指

紹興府志

友直淳熙十一年倅湖州湖州劇郡數易守公間行
郡事輒稱治吏引例卷以攝丞當增俸叱去之一金
不取也提刑陳公公亮提舉黃公適將力薦于朝公
力辭之趙公不迹來守強敏明察官吏嚴憚且謂公
必不合公不改其度守為之降色辭公亦以吏師事
之始終賓敬不可得而親疎時人兩賢之

樓鑰李友直墓志

洪光祖丹陽人右朝奉郎通判湖州

樓鑰洪子忱墓志

宋翔字子飛通判湖州攝郡事

見談志

翔崇安人紹興十二年進士為張浚十客之一韋太

后既歸獻紹興樂府十二章

續文獻通考

張晉望倅湖州

見劉宰集

按晉望其字不知何名

張宗濤通判湖州

見劉奉議墓志

朝請郎前通判湖州曾槃

槃別見建寧徵

槃遂安詹靖之婿陸游為詹作墓表

朱希顏字景淵吳門人通判湖州有善政

詳劉漫塘墓表見藝文

徐綱字希顏乾道壬辰進士添倅湖州

宗德志

史濤四明人初名右谷通判湖州

樓鑰葉夫人墓志

梁季琚字餘父麗水人通判湖州湖去京百里而遙臺

省監司之滯訟悉以委公公閱實其事不為吏欺裁處

其平不為勢撓自本州以及旁郡事多賴公以直經制

之人舊多乾沒當路之督責無已時公檢校彌密歲額

整辦又斥其餘以補前政之虧數以萬計諸司列上其

政孝廟雅聞公名有旨令都堂審察公素靖退力求外

補執政擬他郡上親擢公信州

劉漫塘集

陳貴誠通判湖州

武康志

袁甫字廣微郢人嘉定七年進士第一歷校書郎轉對
言邊事之病不在外而在內偷安之根不去規模終不
立壅蔽之根不去血脈終不通忌嫉之根不去將帥終
不可擇欺誕之根不去兵財終不可治出通判湖州考
常平弊原以增積貯核隱產增附嬰兒局歷起居舍人

兼崇政殿說書時相鄭清之以國用不足履畝使輸券
甫奏其害嘗讀資治通鑑至漢高入關辭秦民牛酒因
奏今日無以與人反橫科之其心喜乎怒乎本朝立國
以仁陛下以為此舉仁乎否乎帝為惻然累吏部侍郎
國子祭酒時邊警日至甫條十事權兵部尚書謚正肅
有孝經說孟子解及文集行世

宋史

方山京字子高慈谿人景定三年廷對第一度宗登極

添差通判安吉州

寧波府志

歸罕仁吳人咸淳中為湖州通判

歸太僕集

謝晟孫字唐卿錢唐人德祐初通判安吉

黃潛謝公墓志

全清夫會稽人嘉熙二年進士

紹興府志

方回字萬里歙人歷官所至皆得幕府譽獨與賈似道

不偶登第後踰紀始改官通判安吉州都堂稟議時則

元祐元年矣

洪杏庭方總官傳

張按周公謹雜事識中極詆方回無行祝希哲乃復

曲護之余謂文士筆鋒都不足據只渠易服迎降偃

然居總管之任便是名教掃地祝不必過護周亦不必苛責也回有詩選名瀛奎律髓楊用修嘗序之

袁裒字德平四明人著書學纂要為湖州推官

宋史

史崇方金壇人咸淳四年進士任湖州推官

鎮江府志

薊邱李衍字仲賓號息齋道人為吳興別駕喜寫墨竹用文與可法動筆鬱然趙松雪推重之題其竹云李侯寫竹有清芬湍紙墨光浮翠筠蕭郎已遠丹青死欲寫

此君惟此人

六研齋筆記叅戴淵源集王氏畫苑

元趙雍字仲穆孟頫子同知湖州路總管府事

書繪寶鑑

至大中馬煦收吳興重建府治命推官范忠董之

湖州路重

建府治記

見勞志

何頤貞為湖州推官

見輟耕錄

頤貞名貞立長沙人見松雪集序

湖州推官劉沂撰重修溪光亭記

今在縣儀門右

曹幕

郡主簿

參軍

簽判

書記

經歷

監稅

晉沈敬言宋沈璞俱為郡主簿

沈約自叙

劉子頊守吳興以殷琰為錄事參軍行郡事

宋書

沈文秀初為郡主簿功曹吏

檀道濟傳

邱仲孚永明初太守徐孝嗣辟為主簿

梁書

梁新渝侯蕭映為吳興郡將召沈恪為郡主簿

天監初柳惲為吳興守召吳均補郡主簿日引與賦詩

均嘗不得意贈惲詩而去久之復來惲遇之如故

沈崇儔天監二年柳惲辟為主簿

並上

李衆隴西人吳興郡司功叅軍

唐宗室世系表

李真湖州錄事叅軍李錮湖州叅軍

上

裴李卿襄陽人湖州司士叅軍

唐宰相世系表

劉彥直湖州司功叅軍

姚希齊陝州人思廉後湖州司功叅軍

鄭朗滎陽人湖州兵曹叅軍

並上

朗字有榮歷中書門下平章事贈司空始朗舉進士

有相者言君當貴然不可以科第進俄而有司擢朗

第一既又覆實被放相者賀曰安之已而果然

新唐書

咸通十三年正月前中書舍人封彥卿貶湖州司戶坐

宰相于琮之親黨也

舊唐書

唐澄慶德元年為吳興郡左衛錄事參軍

一統志

李壇湖州防禦推官溫璐湖州防禦判官

見英華志

張標湖州錄事參軍

上

梅堯臣字舜俞宣城人嘗監湖州鹽稅堯臣為詩深遠
古淡間出奇巧歐陽修以為師友注孫子十三篇撰戴
記二十八卷毛詩小傳二十卷宛陵集四十卷堯臣晚
為詩益工有人得西南夷布弓衣其織文乃堯臣詩也

浙江
通志

鄭戩承奉即守太常寺奉禮郎簽書宣德軍節度判官

廳公事

談
志

戩字天休吳縣人歷陝西經畧安撫使吏部侍郎贈

太尉謚文肅戢遇事果敢必行然憑氣近俠用刑峻

深士民怨之

宋史

戢為楊文公億門人

見歸田錄

曾公亮字明仲晉江人天聖進士知會稽縣坐父買田境中謫監湖州酒稅歷平章事封魯國公拜司空謚宣靖公亮莊重沉默然性嗇善殖貨帝以方張安世

宋史

許將字冲元閩人舉進士第一歐陽修讀其賦謂曰君辭氣似沂公未可量也簽書昭慶軍判官代還當試館

職辭曰起家為官本代耕耳願以守選餘日讀所未見書宰相善其志通判湖州歷尚書左丞中書侍郎謚文

定

宋史

邊裕字道夫家于吳以江寧府司錄監湖州酒稅歲荒飢殍橫道知州張珣委以賑卹全活甚衆有寓士疾草裕初未識之即視饋藥死殮以棺衾後二十年其子知章過湖故老相指曰此吾邊司錄子也歷潤州觀察推

官除官勾南京留司御史臺公事

姑蘇志

李垂字舜工聊城人登進士第上兵制將書自湖州錄
事叅軍召為崇文校勘累遷著作郎上導河形勝書欲
復九河故道時論重之丁謂執政垂未嘗往謁或問其
故垂曰謂恃權怙勢觀其所為必遊朱崖吾不欲在黨
中謂聞而惡之罷知亳州

東都事畧
潁川志

陳彭年字永年撫州人為大理寺詳斷官坐事出監湖
州酒稅歷叅知政事謚文僖彭年附王欽若興符瑞識
者鄙之

宋史

丁寶臣字元珍晉陵人景祐中進士以太常丞監湖州

酒稅歷叅知政事太常禮院

歐陽修丁君墓表

寶臣東坡同年見東坡書歐陽公黃牛廟詩後王安石志其墓曰文於辭為達行於德為充

呂士元字佐堯江寧人湖州司理剛介有節長於為政

贈太常博士

歐陽修呂君墓志

陶節夫潯陽人湖州錄事叅軍某頃歲謫守宣州而節

夫叅軍事甚宜其職

沈括長興集

趙師臯 趙善臨 鄭鎮 並湖州簽判

見建
置徵

劉異湖州司法叅軍

上

異字成伯興化人天聖中進士歷屯田員外郎與蔡

襄友善

何絃浦陽人物
志榕陰新檢

呂延之真州揚子縣人湖州節度判官贈屯田郎中

蔡
襄

呂士昌
墓志

陳瓘字瑩中南劍州人中甲科調湖州掌書記歷左司
諫論蔡京蔡卞奸惡崇寧中竄廉州靖康初贈諫議大

夫高宗賜謚忠肅

宋史

元豐二年初任昭慶軍掌書記湖州府學教授七年

改濠州定遠宰

陳忠肅年譜

陳師錫字伯修建陽人熙寧中遊太學有雋聲及廷試奏名在甲乙科神宗偶讀其文屢加嘆賞顧侍臣曰此必陳師錫也啓封果然擢為第三調昭慶軍掌書記歷

監察御史元祐初遷工部員外郎坐黨論置柳州師錫

始與陳瓘同論京下時號二陳紹聖中贈直龍圖閣

宋史

閑樂奏議一卷陳師錫撰熙寧九年第進士蘇軾知
湖州師錫掌書記器之倚以為政軾得罪捕詣臺獄
親朋多畏避師錫獨出餞之又安輯其家軾入西掖
薦自代明著其事師錫在元豐己為察官坐論進士
習律罷出建中靖國初再入未幾又罷

書錄解題參
建寧府志

雷覺民字將道建安人第進士調漳浦尉改湖州司錄
太守不以時給糧諸軍喧于庭久不退覺民諭以經制
錢代給後當積日俸為償之諸軍感謝而去

建寧
府志

張弼初名駕字安時南劍州人熙寧九年進士歷監湖

州新市鎮終知廣濟軍

楊龜山集
八閩通志

文安國元豐八年湖州簽判

鐘鼎款識
詳瑣徵

文勛字安道東坡文勛篆贊云安國用筆意在隸前

跋文勛畫扇云安國作方界畧不抒思黃魯直文勛

贊云為吏不殘去其敗羣好賢喜士黽勉而勤勛嗜

古而癖載米襄陽志林

李宗師興化人莫儔榜第二人湖州掌書記

八閩志

唐稷字堯弼會昌人政和二年登乙科宣和五年授湖

州叅軍兼管左右獄多平反

贛州府志

樓昇字試可明州人進士高第嘗監湖州烏鎮稅厯徽

猷閣直學士

見樓攻媿王逸老八仙歌跋安
康郡夫人行狀叅宋史新編

錢觀復字知原常熟人政和五年進士調湖州戶曹朱

勔以鄉人固欲妻以女辭不受知廣德軍歲上供民米

輸送回遠加斂水脚錢乃請寄廩湖之四安至國門才

五日費減大半

姑蘇志

李敦正莆田人建炎二年進士湖州簽判

八閩志

周大年濟南人迪功郎湖州司李叅軍

周必大周樞神道碑

曾惇字宏父布之孫紆之子也紹興中嘗為湖州司錄

歷知台州

玉照新志叅文獻通考

蘓掖丹陽人癖飲子也承議郎湖州司戶叅軍

見歐陽修蘓子

美沈遼長壽

太君二志

薛龜從永嘉人湖州司法

葉水心薛紹墓志

葛書思江陰人嘗監湖州新市鎮有仙潭雜咏刻石墨

妙亭歷朝奉郎贈太師謚清孝即丞相邨之曾祖也

見勞

志參陳

止齊集

王文禮字立之龜齡先生子也由太學用詹事恩補承務郎監湖州烏青鎮有醫善為方得賜帶如從官吏畏之宴聖節居卿監上公按令黜其班又有訟其留人子女者奪以還民醫不勝忿挾他勢搖公因力求去

葉水心集

按宋史十朋子聞禮當以史為正醫即王克明也王十朋子聞詩聞禮皆篤學自立聞禮知常州江東轉

運判官為治能守家法

宋史

王獻字渭夫少嗜讀書明周禮寶慶二年進士調昭慶

軍節度掌書記諸公文薦除太學錄

仙游縣志

朱堃字文之文公次子用廕補官歷監德清縣新市鎮

考亭湖

源錄

湯宋彥字時美金壇人授迪功郎湖州司戶叅軍湖劇

郡戶冗曹公以妙年居之有裕錄重囚於獄得其冤狀

自請更詢未幾更獲正囚闔郡稱其明

劉漫塘湯君行述

許開字仲啓湖州簽判

談志

黃童紹興八年進士監湖州新市鎮

興化志

王介字元石金華人紹興初進士授昭慶軍判官寧宗

立韓侂胄出入禁中介力攻之坐是斥去累官中書舍

人會不雨乞冊免宰相史彌遠出知嘉興府謚忠簡

統一統

志宋史

王介東陽郡人授昭慶軍簽書節度判官廳公事光宗久

不覲重華宮介走書諷趙汝愚宜率百僚守寧和門

族六飛之動入為學官又上疏懇言之介初學於呂

祖謙徙居金華故文學有原委

姑蘓志

劉嵩文林郎昭慶軍節度判官

黃潛劉錄事墓志

湯誼伯丹陽人湖州戶曹

姑蘓志
參宋史

葛應龍天台人淳祐戊申受辟江西帥監德清左庫嘗

於餘不溪上建左顧亭

葛應龍左
顧亭記

洪興祖字慶善丹陽人少讀禮至中庸頓悟性命之理

績文日進登政和上舍第為湖州士曹紹興四年蘓湖

地震興祖時為駕部郎官應詔上疏具言朝廷綱紀之失為時宰所惡主管太平觀直敷文閣興祖好古博學自少至老未嘗一日去書著老莊本旨周易通義繫辭要旨古文孝經序贊離騷楚詞考異行於世

宋史

興祖又為湖學教授

郡志

趙師揆添差湖州簽判

宋史

鄭琚字伯潤壽昌人性明敏輕財好施淳祐間登進士乙科咸淳十年遷安吉州司李叅軍推情治獄人無冤

濫嚴州府志

徐子端字克之豐城人鹿卿子也蔭入仕初調監烏青鎮時更造楮幣漕司責以日解槿葉千斤吏牒旁午子端謂非庶工所有累請得免轉黃州推官歷官所在見稱及宋運革杜門讀書作後泉散人傳引蔡季通獨行不愧影獨寢不媿衾之語以自擬

南昌府志

劉黻字聲伯樂清人試太學以才署昭慶節度掌書記

宋史

新編

文及翁蜀人官吳興為節度府掌書記

朱吉甫墓碑

陳榮承節郎咸淳中監南潯鎮事

嘉應廟碑

元王廓字元舉徐州人至正二年燕南第一人授湖州

經歷

徐州志

楊默冀寧人湖州錄事判官

貢師泰揚州志

劉濟字仲源河間肅寧人湖州路總管府經歷

黃潘劉都事志

顧巖壽字子靜以儒進歷湖州路總管府經歷器識弘

遠博學通時歷職三十年所至有政聲

鎮江志

胡居善字伯仁天台人至正間授湖州路錄事司判官

天台志

武臣

駱牙字旗門梁太清末世祖嘗避地臨安牙母凌覩世祖儀表知非常人賓待甚厚及世祖為吳興太守引牙為將帥因從平杜龕張彪等每戰輒先鋒陷陣勇冠衆

軍以功授直閣將軍

陳書

烏戍鎮守將軍烏贊張掖人邠國公重胤之猶子也初

贊侍重脣為潞州牙將時王承宗叛王師討之潞帥盧從史密與賊通贊與重脣畫謀縛從史於帳下斬之朝廷賞其功授重脣為懷州刺史充河陽三城節度使而以贊為左司馬充湖州鎮海軍節度使李錡以烏墩為湖州要地檄贊將兵戍憲宗元和二年李錡反遣使來諭贊令起兵即斬其使曰吾豈從賊反叛者耶錡聞之怒自引兵犯烏墩贊與副將吳起勒兵禦之贊兵以衆寡不敵遂戰沒已而收葬於鎮上智潭之北時元和二

年十月也未幾騎就擒鎮民請於朝立廟墓前以祀

直浙

分署紀事

木末錄

朱行先字蘊之吳郡人也少親戎律長習武經始隸職
於建寧都從高公彥征討有功尋彥分符雲渚亦隨於
治太守用為心膂或鄰境有寇總握兵柄仗劍前驅無
不望風瓦解滅竈之謀投醪之誼備盡其妙以是聞於
聖聰疊被寵加薦厯珥貂益為雲守所重自渤海公厭
世高湮亂行府君奮臂一呼率衆歸國時天下都元帥

吳越國王親統全師撫寧郡縣以有功者宜加爵賞遂封協力勤王功臣尋封右僕射寶大元年四月終於靜海鎮之官舍世墓在烏程縣不克歸葬在開元府海鹽

縣厝於埜村

謝諤朱府君墓志

屠環智字寶光世居澈浦青山母顧夢抱璧有光而生故名環智少負勇畧從吳越武肅王起鄉兵拒黃巢與幕府籌畫積功領常州刺史越州都指揮使副高彥守湖徐綰內叛遣環智與子渭赴難至靈隱山賊圍數重

兩人轉戰身被百創環智奮力一呼手搏數賊以援絕
同遇害王慟其殉國以衣冠歸葬青山贈武康節度使
銀青光祿大夫檢校尚書右僕射開府儀同三司子晟

吳興判官

海鹽縣
圖經

侍其曙字景升咸平中以閤門祗候為蘓杭湖秀等州

都巡檢使

曙畧

曙為人沉敏有幹畧善論利害

宋史

王寔字定叟東陽人理宗即位充浙西副都監湖州駐

劉時潘甫等起兵事甫定霆因綏撫之

宋史

宋末張濡馮驥皆獨松關戍將郁天興吳明皆四安鎮

戍將

宋史詳
戰守徵

按吳明馮驥咸殉蒙古之難視劉整范文虎二賊人禽哉抑可奴畜夢炎宜中輩謂甲冑不如珮玉吾勿信也亟當表出之

費愚字子賢國初從舉義渡江為廣德翼元帥時張士誠據浙西丙申我兵克安吉上命子賢與總管張俊德

戍其地二人因築城守之士誠連歲出兵皆為所敗乙巳冬士誠遣其將張左丞帥兵八萬來攻時城中僅三千人愚等堅守設車弩以禦之因射殺其梟將二人敵

驚潰城賴以全

安吉州志

劉成負膽智驍勇絕倫國初歸附耿炳文取長興敗張士誠守將為守禦計士誠遣其左丞潘元明元帥嚴再興入寇成與炳文擊敗之每戰輒勝寇不敢犯洪武三年置海寧衛以成為指揮僉事後以殺賊中流矢卒人

思其功祀之

宿州志

功臣錄云竊觀吾聖祖取天下於羣雄惟以偽漢為
勁敵鏖戰數年卒就殲無所逃命以偽吳不敢相援
故也偽吳所以不敢相援者以炳文守長興則成實
佐之也當姑蘓鴟張長興其必爭之地孤城血戰歷
十餘稔吳保無虞由斯言之成之功豈細也哉

偽吳湖州左丞張天騏湖州將尹義石清長興將李福

安趙打虎

詳戰守徵

吳興備志卷六